

Protocol no. 8
Sezzüda da marcurdi, 29 favrer 2012, 9.00- 12.15

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)

Protocol

Il protocol no. 7 da la sezzüda da mardi, 21 favrer 2012 vain approvà.

41 021 FABRICA
Carlos Gross – Renovaziun Hotel Rezia. Plaz 154

Sün dumonda da sar Gross da pudair renovar l'hotel Rezia internamaing e d'ingrondir a l'extern tant la spuonda da la lobia sura vers vest existenta sco eir l'üscha da garascha vers ost e da pudair far ultra da quai fouras geotermicas decida il Cussagl cumünal da conceder il permiss. Las cundiziuns a regard las fouras geotermicas vegnan fixadas aint il permiss da fabrica. La taxa da trattamaint sco eir las taxas d'attach as drizzan tenor l'art. 9 e l'art. 14 dal reglamaint da taxas dal cumün da Sent.

42 012 EXECUTIVA
Criteria per surdar lavurs dal cumün

Per avair directivas cleras a regard il surdar da lavurs dal cumün, vules il Cussagl cumünal fixar ils criteris impegnativs per talas surdattas. Davo avair discus il tema, decida il Cussagl cumünal cha da princip hajan las lavurs dal cumün da gnir surdattas tenor la ledscha da submitsiun dal chantun Grischun. In basa a quella ledscha füssa però da resguardar scha ma pussibel las firmas indigenas, **fintant cha quellas nu fan abüs da la fiduzcha** demuossada invers ellas. Plünavant decida il Cussagl cumünal unanim da vulair resguardar in prüma lingua las dittas cun domicil d'impostas a Sent e da vualir far scha ma pussibel adöver dal art. 14.3 da la ledscha da submitsiun chi prevezza la surdatta da lavur tenor proceder a man liber.

44 83 TURISSEM
Punts penduossas Val Sinestra

Sco manzunà fingià illas orientaziuns dal protocol no. 1 dals 10 schner 2012 nu correspuondan las punts penduossas in Val Sinestra, tenor ün parair da la firma Cresta Geo, a las disposiziuns legalas da sgürezza, tant cha'l cumün pudess gnir fat respundabel per eventuels dons ed accidaints. Per pudair proseguir illa fatschenda, esa necessari da ramassar tuot las actas disponiblas a regard la fabrica da las punts. Il Cussagl cumünal giavüscha perquai cha'l silvicultur chi ha manà il proget da las punts preschainta fin la fin da marz 2012 üna documentaziun cronologica cumpletta dal proget cun calculaziuns, preventiv, dumondas da fabrica, credits e rendaquint. Tuot tenor esa pussibel da chattar üna soluziun regiunala pels cuosts da la sanaziun da las punts.

45 012.318.02 Proget fusiuns
Gruppa operativa pel proget da fusiuns

Il capo orientescha sur da la prüma sezzüda cha'ls tschinch capos han gnü insembel cul respunsabel pel proget da fusiuns sar Tino Zanetti ed cun sar Marcel Franziscus da la firma indigena Lischana Fiduziari chi accumpogna il proget. In quella sezzüda esa gnü decis da s-chaffir üna gruppa operativa pel proget chi as cumpuona da raduond quindesch personas dals tschich cumüns pertocs, q.v.d. dals tschinch capos, tschinch cusgliers e quatter fin tschinch impiegats da las administraziuns cumünalas. Per la gruppa operativa sun gnüdas proponüdas las seguaintas personas da nos cumün: il capo Albert Mayer, il cusglier Andri Poo e Rico Zini da l'administraziun cumünala. Il Cussagl cumünal conferma quistas propostas, uschè cha'l cumün da Sent sarà rapreschantà adequat illa gruppa operativa.

46 790 PLANISAZIUN DAL TERRITORI
PEB – Questionari a regard progets regionals

La Pro Engiadina Bassa vules registrar tuot ils progets existents o previs dals cumüns chi füssan vairamaing d'interess regional e chi füssan perquai eir degns da gnir mantgnüts, finanziats e portats da la regiun. Our da quel motiv vegnan ils cumüns giavüschats d'implir oura ün questionari cun progets cumünals da different gener chi sun d'interess surregional, regional o subregional. Il termin per inoltrar il questionari a la PEB es fixà süls 11 marz 2012. Il capo giavüscha cha'ls cusgliers as occupan cun quista dumonda e ch'els preschaintan a la prosma sezzüda lur propostas pel questionari da la PEB.

47 860.318.04 Cità d'energia
Partecipaziun vi d'ün proget da pilot

Sün dumonda da la firma *econcept AG* scha'l cumün da Sent as vules participar vi da proget da pilot chi ha per mera da manisar cun ün indriz tecnic ils s-chodamaints electricis in abitaziuns da vacanzas da maniera chi gniss sbassà il consüm da forza electrica decida il Cussagl cumünal d'annunzchar l'interess dal cumün da Sent sco cumün da pilot, resalv cha las contribuziuns pel proget cuvernan ils cuosts pel cumün.

49 942.312 Aua, energia e s-chodamaint - stabilimaints da finanzas
Rimplazzamaint dal boiler – scoulina

Il boiler i'l stabilimaint da la „Centrala“ sto gnir rimplazzà. La società d'alp e chascharia Sent ch'id es comproprietaria dal stabilimaint ha tut aint offerta per ün boiler nouv. Ils cuosts totals s'amuntan sün bundand fr. 8'000.--. Il cumün es participà cun raduond ün terz dals cuosts. Il Cussagl cumünal decida da dar liber ün credit da fr. 2'700.-- per la partecipaziun vi dals cuosts dal boiler nouv.

50 79 PLANISAZIUN DAL TERRITORI
Revisiun da la planisaziun cumünala

Il schef da planisaziun preschainta üna notizcha d'acta sur dals puncts principals da la discussiun ch'el ha gnü cul planisader dal cumün O. Menghini. Il planisader ha gnü invista illa notizcha d'acta ed ha pudü far sias objecziuns. Il schef da planisaziun giavüscha cha'l Cussagl cumünal as prepara, as basond sül rapport da planisaziun e da cooperaziun dal planisader e sülla notizcha d'actas manzunada, per üna sezzüda extraordinaria cul tema revisiun da planisaziun cumünala. In quella sezzüda dess gnir decis sur dal prosequimaint illa fatschenda ch'id es pel mumaint amo sistada pro las istanzas chantunalas.

Fundaziun “Cumünanza d’interess dals cumüns concessiunaris dal Grischun” (IBK)

Il capo orientescha chi haja lö als 12 marz 2012 a Cuaira la radunanza da fundaziun da la IBK (Interessensgemeinschaft Bündnerischer Konzessionsgemeinden). Il schef d’energia pigliarà part a la radunanza da fundaziun.

Radunanza generala da la Grischelectra AG

Il capo orientescha ch’ eir la radunanza generala da la Grischelectra AG haja lö als 12 marz 2012 vers saira. Il schef d’energia pigliarà part a la radunanza generala.

Delegiada da la CCC OEE a Tschlin

Il capo orientescha sur dal preavis ch’el ha survgni per la delegiada da la CCC OEE chi ha lö als 29 marz 2012 a Tschlin. Quel di sarà la cumischiun dal Grond Cussagl a Tschlin chi tratta la fusiun Valsot, sco eir la presidenta da la regenza duonna Barbara Janom Steiner chi s’ha declarada pronta da tgnair eir ün cuort pled a la delegiada da la CCC OEE.

DMO TSSVM

La DMO TSSVM es daspö ün on in vigur. Our da quel motiv tschercha il directer sar Urs Wohler il contact culs cumüns per ün barat d’ideas e d’infuormaziuns. La sezzüda dal Cussagl cumünal culs exponents da la TSSVM ha lö als 20 marz 2012.

L’actuara: